



XUNTA DE GALICIA

CONSELLERÍA DE CULTURA, EDUCACIÓN
E ORDENACIÓN UNIVERSITARIA
Secretaría Xeral de Universidades

galicia



CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E A FUNDACIÓN EMPRESA- UNIVERSIDADE GALEGA (FEUGA) PARA IMPULSAR PROGRAMAS DE POSICIONAMENTO E CAPTACIÓN DE PROXECTOS EUROPEOS PARA O SISTEMA UNIVERSITARIO GALEGO

Santiago de Compostela, 23 de maio de 2018

COMPARECEN

Dunha parte, D. Román Rodríguez González, conselleiro de Cultura, Educación e Ordenación Universitaria (en diante CONSELLERÍA), nomeado mediante o Decreto 148/2016, do 13 de novembro (DOG núm. 217, do 14 de novembro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Doutra, a Fundación Empresa-Universidade Galega (en diante FEUGA), con enderezo social en Santiago de Compostela, na Rúa Lope Gómez de Marzoa, s/núm. CIF G15051667, representada neste acto por D. Francisco Javier Pereiro Pérez, director xeral, con poder en virtude de escritura pública núm. 963, outorgada o 19 de outubro de 2009, ante a notaria Dona Susana Ortega Fernández, do ilustre Colexio de Galicia, con residencia en Ferrol.

Interven en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- A creación de FEUGA respondeu a unha iniciativa dos máis sobresaíntes axentes públicos e privados da comunidade. Como fundación de interese cultural, está recoñecida pola Lei do 1 de agosto de 1984 (DOG núm. 206, do 26 de outubro) e inscrita no Rexistro de Fundacións da Xunta de Galicia co núm. 155 e que se institúe como fundación de interese universitario no ano 1982, ao amparo do Decreto 2930/72, do 21 de xullo.





FEUGA é unha entidade sen ánimo de lucro e de dereito privado, especializada na transferencia de coñecemento, innovación e tecnoloxía desde o Sistema universitario de Galicia ao mundo empresarial e á sociedade en xeral.

A súa misión é achegar a competencia, a habilidade, a experiencia, o talento e o saber científico e técnico xerado polos grupos de investigación universitarios ao mercado, para favorecer o emprendemento na universidade e o dinamismo no tecido produtivo. FEUGA rendibiliza o traballo do persoal investigador para provocar o salto dos seus coñecementos á aplicación práctica, de xeito visible e compartido.

O Padroado é o órgano de goberno, representación e administración de FEUGA. Os seus membros fundadores son as tres universidades galegas e as máis prestixiosas institucións públicas e empresas privadas de Galicia.

SEGUNDO.- O novo Plan Galicia Innova 2020 en liña cos obxectivos da Estratexia de Especialización Intelixente de Galicia 2014-2020 (RIS3), e acorde co Plan da Unión Europea Horizonte 2020 e a Estratexia Española de Ciencia, Tecnoloxía e Innovación 2013-2020, aspira a consolidar un modelo de crecemento inclusivo e sostible situando á I+D+i como factor clave para garantir a competitividade da economía e a capacidade da sociedade galega para responder ás transformacións globais e aos retos sociais. Concretamente unha sociedade comprometida coa innovación, capaz de adaptarse aos cambios e responder ós seus retos, que camiña cara a maiores niveis de calidade de vida a través da ciencia, a investigación e a innovación.

O Plan Galicia Innova 2020 establece dentro da Acción Estratéxica 3. Talento e Capacidades en I+D+i, o establecemento de medidas prioritarias para a xeración, atracción, retención e retorno de talento en I+D+i., coa finalidade de promover a incorporación, a atracción e a retención en Galicia de persoas capaces de liderar e desenvolver actividades de I+D+i, tanto no ámbito científico como empresarial, que permitan asegurar a sostibilidade e garantir a competitividade do ecosistema a medio e longo prazo.

A captación do mellor talento científico e innovador é esencial para fortalecer o Sistema público de investigación galego, por iso a CONSELLERÍA promove aos mellores investigadores/as sen que o seu éxito comporte unha carga orzamentaria para a universidade, centro de investigación universitario ou grupo. Ademais estimase que é coherente co Plan Galicia Innova 2020 en tódalas súas áreas de acción estratéxicas: Acción 1 Coñecemento excelente e transferible; Acción 2 Innovación e Emprendemento; Acción 3 Talento e Capacidades en I+D+i e Acción 4 Gobernanza, avaliación e promoción da cultura innovadora.





TERCEIRO.- No ano 2016 a Consellería de Cultura, Educación e Ordenación Universitaria asinou un convenio que iniciou un proceso de colaboración coa FEUGA fundamentado en apoiar accións das tres universidades que integran do Sistema Universitario de Galicia (SUG) destinado, de xeito específico, ao “Posicionamento, promoción, divulgación e captación de proxectos europeos para promover a participación e o posicionamento de grupos de investigación do SUG en proxectos europeos”.

Tendo en conta os excelentes resultados obtidos, analizados tanto en termos de rendibilidade económica, como de posicionamento estratéxico internacional dos grupos de investigación do SUG, considérase necesario consolidar, ampliar e instrumentalizar esta colaboración; sobre todo, tendo en conta que cos resultados obtidos ata o de agora, están encamiñados outros proxectos que serán unha realidade en 2018 e nos anos seguintes.

CUARTO.- A colaboración terá como principio fundamental o intercambio continuo de información entre a FEUGA e os grupos de investigación das Universidades do SUG. A promoción tecnolóxica e a dinamización da I+D+i son obxectivos fundacionais da FEUGA, onde a misión final é conseguir que os resultados acadados polos investigadores/as en innovación, tecnoloxía e coñecemento sexan trasladados ao mundo empresarial e a sociedade en xeral, ao tempo que se consolida o emprendemento na universidade e o dinamismo no tecido produtivo.

A creación de FEUGA respondeu a unha iniciativa dos máis representativos axentes públicos e privados da comunidade. Forman parte do seu padroado a Universidade de Santiago de Compostela, a Universidade da Coruña, a Universidade de Vigo, prestixiosas institucións públicas, entidades e empresas de Galicia. Neste convenio, as actuacións a realizar por FEUGA operarán como un instrumento áxil para conectar a capacidade das universidades galegas co entorno empresarial e a sociedade, repercutindo directamente nos intereses das tres universidades que integran o SUG.

QUINTO.- Que a Secretaría Xeral de Universidades, de acordo coas competencias que lle outorgou o Decreto 4/2013, do 10 de xaneiro, de estrutura orgánica da CONSELLERÍA, debe velar pola promoción e xestión eficiente e integrada dos recursos e capacidades de investigación do SUG para a súa vertebración e posta en valor no marco do Sistema de innovación. Entre estas competencias está a promoción da coordinación das universidades galegas no establecemento de programas, infraestruturas e actuacións en materia de investigación.



A colaboración coa FEUGA é unha forma eficiente de prestar apoio ás tres universidades galegas para identificar as oportunidades de financiamento máis axeitadas e contribuír así a captación de fondos comunitarios, superando accións individuais de cada unha que resultarían menos eficaces.

SEXTO.- Que o novo Plan Galicia Innova 2020 define na súa acción estratéxica I>. Coñecemento Excelente e Transferible “a valoración, transferencia e orientación a industria”, consolidando un sistema galego de xeración de coñecemento que aprende e se conecta á realidade do tecido produtivo para responder e adiantarse ás necesidades da sociedade, articulando modelos de colaboración entre axentes e dinamizando procesos de valorización e transferencia que maximicen a orientación dos resultados.

De acordo co exposto nos puntos anteriores, as partes abaixo asinantes acordan subscribir o presente convenio, que se rexerá polas seguintes

CLÁUSULAS

PRIMEIRA.- Obxecto do convenio e finalidade

O obxecto deste convenio é establecer as condicións polas que se rexerá a colaboración da Consellería de Cultura, Educación e Ordenación Universitaria e a FEUGA para executar accións destinadas a impulsar e consolidar un programa conxunto de posicionamento e novas accións de apoio ao Sistema Universitario de Galicia.

Concretamente levarase a cabo o financiamento para a execución das seguintes accións:

ACCIÓN 1: Posicionamento, promoción, divulgación e captación de proxectos europeos do SUG (2018-2020) para promover a participación e o posicionamento de grupos de investigación do SUG en proxectos europeos.

Para iso realizaranse unha serie de actividades que terán como obxectivos os seguintes:

- Traballar con grupos de investigación do SUG: combinando información interna e externa para a definición de proxectos.

Realizar e ter presenza en actividades de posicionamento internacional: eventos, agrupacións tecnolóxicas, entidades rexionais, nacionais e europeas.

Aumentar a captación de fondos derivada dos proxectos europeos.





- Incrementar as colaboracións internacionais das universidades galegas, así como as colaboracións co sector industrial.

	ANO 2018	ANO 2019	ANO 2020
ACCIÓN 1	309.654 €	314.300 €	319.014 €

ACCIÓN 2: Programa de desenvolvemento de competencias en xestión estratéxica de centros e unidades de investigación de excelencia, iniciativa pioneira en España integrada por dous programas formativos, GESCI e GOSCI, dos que se realizarán tres edicións.

- GESCI (xestión estratéxica de centros e unidades de investigación de excelencia). Pretende potenciar as capacidades dos investigadores e as investigadoras principais do SUG para que lideren as unidades e centros galegos de I+D sobre unha base de eficiencia, accountability e excelencia científica.
- O programa constará de 6 módulos temáticos (posicionamento, estratexia, gobernación, financiamento, persoas, management) e dous workshops (avaliación científica e institucional e habilidades directivas).
- GOSCI (xestión operativa de centros e unidades de investigación de excelencia). Pretende potenciar as capacidades dos xestores de unidades e centros galegos de I+D para que colaboren coa dirección na definición e execución das accións establecidas nos seus plans operativos.
- O programa constará de 6 módulos (posicionamento, estratexia, gobernación, financiamento, persoas, management), e catro workshops (avaliación de portfolio tecnolóxico, Leanstartup e emprendemento áxil, creatividade e European Innovation Council).

	ANO 2018	ANO 2019	ANO 2020	ANO 2021
ACCIÓN 2	155.724 €	371.347 €	373.171 €	235.670 €

ACCIÓN 3: Creación e implantación dun proceso para a detección e preavaliación de tecnoloxías do SUG. Acción que pretende propor e desenvolver un proceso de detección e preavaliación de tecnoloxías provenientes do SUG cun elevado potencial de transferencia ao mercado, para:

- Crear un proceso estándar no nivel rexional para a detección de tecnoloxías con potencial de transferencia ao mercado.
- Mellorar a comunicación e estandarizar procesos e metodoloxías entre as diferentes entidades xeradoras de coñecemento.
- Priorizar accións de transferencia e pasos a seguir coas tecnoloxías detectadas mediante o proceso definido.
- Aplicar o devandito proceso de preavaliación a 42 tecnoloxías do SUG.

	ANO 2018	ANO 2019
ACCIÓN 3	69.058 €	89.897 €



ACCIÓN 4: Perfís profesionais de futuro e mapa de novas titulacións e especialidades para Galicia. Estudo de prospectiva de tendencias globais e sectores estratéxicos con impacto no emprego de Galicia 2030 co obxectivo de desenvolver un catálogo completo de perfís profesionais de futuro e definir un mapa de novas titulacións e especialidades universitarias para o SUG acorde coas necesidades e esixencias da sociedade e o mercado vindeiros.

A acción constará das seguintes fases:

- Fase 0: Organización e lanzamento da acción.
- Fase 1: Elaboración dun catálogo completo de profesións de futuro para Galicia.
- Fase 2: Definición dun mapa de novas titulacións e especialidades para o Sistema universitario de Galicia.
- Fase 3: Recomendacións.

	ANO 2018	ANO 2019
ACCIÓN 4	413.546 €	299.447 €

SEGUNDA.- Contía da axuda

A dotación da CONSELLERÍA para este convenio é de dous millóns novecentos cincuenta mil oitocentos vinte e oito euros (2.950.828 €) distribuído en catro anualidades con cargo ao Plan galego de financiamento universitario 2016-2020 (aprobado polo Acordo do Consello da Xunta de Galicia do 29 de outubro de 2015, DOG número 221, do 19 de novembro), aplicación orzamentaria 10.40.561B.781.0 (código de proxecto 2016 00366).

Dado que o financiamento destas axudas procede do Plan Galego de Financiamento Universitario para o período 2016-2020, a anualidade 2021 integrárase no novo plan de financiamento para os anos seguintes.





A distribución por anualidades será a seguinte:

	ANO 2018	ANO 2019	ANO 2020	ANO 2021
ACCIÓN 1	309.654 €	314.300 €	319.014 €	
ACCIÓN 2	155.724 €	371.347 €	373.171 €	235.670 €
ACCIÓN 3	69.058 €	89.897 €		
ACCIÓN 4	413.546 €	299.447 €		
TOTAL ANUAL	947.982 €	1.074.991 €	692.185 €	235.670 €
Total final				2.950.828 €

Esta cantidade de 2.950.828 € trátase dun importe certo, e queda por conta da FEUGA a diferenza de financiamento necesario para a total execución das actividades subvencionadas, debendo ser reintegrado o financiamento público no caso e polo importe que supere o custo total e real da actividade, segundo o establecido no artigo 21.2 do regulamento da Lei 9/2007, do 13 de xullo, de subvencións de Galicia, aprobado polo Decreto 11/2009, do 8 de xaneiro.

A axuda é compatible con outras concedidas para o mesmo fin, pero en ningún caso, o importe da subvención achegada pola CONSELLERÍA poderá ser de tal contía que, illada ou en concorrencia con outras subvencións, supere o custo da actividade subvencionada, tal como se establece no Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia.

De acordo co disposto na comunicación da comisión sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención prevista neste convenio non constitúe axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta ao obxectivo do interese común. Así, a FEUGA é unha fundación sen ánimo de lucro que ten entre os seus fins a difusión da investigación e o coñecemento, co obxectivo de estimular a actividade innovadora mediante a contribución á transferencia de coñecementos, a difusión da información e a colaboración entre as empresas e as organizacións de investigación, prestando servizos de asesoramento/apoio en materia de innovación.

Non obstante a FEUGA deberá garantir que as actividades derivadas deste convenio se axustan ás normas procedimentais e materiais vixentes no momento da concesión da axuda, e debe informar á CONSELLERÍA por medio da comisión de seguimento.



TERCEIRA.- Obrigas

A CONSELLERÍA comprométese a colaborar no financiamento do gasto realizado pola FEUGA para impulsar as accións descritas neste convenio.

A FEUGA comprométese a que das actuacións previstas se beneficien as tres universidades do SUG e a facer constar en calquera tipo de publicidade e información que realice ao respecto a participación e a colaboración da Consellería de Cultura, Educación e Ordenación Universitaria.

De conformidade co artigo 31.7 da Lei 9/2007, do 13 de xuño, de subvencións de Galicia, non poderá realizarse o pagamento da subvención en tanto a FEUGA non se atope ao corrente no cumprimento das súas obrigas tributarias e fronte á Seguridade Social e non teña pendente de pagamento ningunha outra débeda coa Administración pública da comunidade Autónoma ou sexa debedor por resolución de procedencia de reintegro

CUARTA.- Fórmula de pagamento

A CONSELLERÍA realizará o pagamento contra a presentación (antes do 30 de novembro de cada ano) por parte da FEUGA dunha memoria anual na que se dea conta do destino da achega e dunha declaración na que conste o cumprimento da finalidade do presente convenio e na que se recolla que os fondos foron destinados ao obxecto do convenio, así como o detalle da realización dos gastos e dos pagamentos. Os ditos gastos acreditaranse mediante a presentación das correspondentes facturas e demais documentos de valor probatorio equivalente, achegándose tamén os comprobantes dos pagamentos efectuados.

Poderán realizarse pagos parciais a conta da liquidación final nas condicións establecidas na normativa vixente e logo da presentación da documentación acreditativa que corresponda referida na epígrafe anterior.

Así mesmo, deberá acreditarse que FEUGA está ao día no cumprimento das obrigas tributarias ou fronte á seguridade social e de non ter débedas coas administracións. Tamén se aportará unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.





QUINTA.- Vixencia do convenio

O presente convenio entrará en vigor na data da súa sinatura, sen prexuízo de que poidan atender accións realizadas desde o 1 de xaneiro de 2018 e terá vixencia ata o 30 de decembro de 2021.

Non obstante ao establecido no apartado anterior, este convenio poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. En calquera destes casos procederase á revogación da axuda, así como ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

SEXTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian desenvolver as actividades e a CONSELLERÍA, de tal xeito que non se lle pode esixir responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

SÉTIMA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, créase unha comisión mixta constituída do seguinte modo:

- Tres membros da Secretaría Xeral de Universidades, dos que un/unha actuará como presidente/a.
- Tres membros da FEUGA.

A dita comisión actuará como órgano de vixilancia, seguimento e control do establecido neste convenio, promovendo, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola CONSELLERÍA.





OITAVA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a FEUGA consente expresamente para que a administración autonómica inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

A reserva que puidera facer a FEUGA no sentido de non autorizar a obtención dos datos ou a publicidade destes nos rexistros, que en todo caso terá que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

A subvención estará sometida á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación e previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno e de acordo co indicado na actual redacción do artigo 20 da Lei 38/2003, de 17 de novembro, xeral de subvencións, a información correspondente ao presente convenio publicárase na Base de Datos Nacional de Subvencións.

As partes asinantes do presente convenio manifestan o seu consentimento ou autorizan para que os seus datos persoais que constan no convenio, e mailo resto das especificacións contidas no mesmo, podan ser publicados no Portal da transparencia e Goberno aberto.

De acordo co estipulado no artigo 53 da Lei 40/2015, de 1 de outubro, de réxime xurídico do sector público, este convenio deberá ser remitido ao Consello de Contas nos termos que no mesmo se establecen.

NOVENA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un interese público dado que é preciso despregar unha rede de intelixencia que detecte e explote oportunidades de crecemento e mellora para o Sistema universitario de Galicia e dar resposta ás necesidades de transferencia de investigación por medio de accións para promover que as universidades públicas galegas poidan participar en proxectos de investigación europeos e internacionais.





Estas accións esténdense ás tres universidades galegas, podendo beneficiarse todos os grupos de investigación do SUG e, polo tanto, non sendo necesario promover a concorrència competitiva.

Este convenio de colaboración ten a natureza dos previstos no artigo 6 da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, e realízase ao amparo do establecido nos artigos 47 e seguintes da Lei 40/2015 do 1 de outubro, de réxime xurídico do sector público, rexéndose polo establecido nas súas cláusulas e polo establecido na Lei 9/2007, de 13 de xuño, de subvencións de Galicia e no seu Regulamento, aprobado polo Decreto 11/2009, do 8 de xaneiro.

DÉCIMA.- Resolución de controversias

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 47 e seguintes da Lei 40/2015, do 1 de outubro, de réxime xurídico do sector público.

Lido por todas as partes, por si mesmas, e como proba de conformidade co expresado no presente convenio, asinano e rubricano por triplicado, no mesmo lugar e data que se indica ao comezo.

O conselleiro de Cultura, Educación e
Ordenación Universitaria



Román Rodríguez González

O director xeral de FEUGA

Francisco Javier Pereiro Pérez